

# UVODNIK

**I** OVAJ BROJ “ZNAKOVA VREMENA” čitateljima nudi tematski i idejno veoma raznovrsne i krajnje angažirane tekstove domaćih i stranih autora.

U prvom odjeljku objavljujemo tekstove koji govore o Huseinu Đozi jednom od najistaknutijih bosanskomuslimanskih intelektualaca prošloga stoljeća. Za razliku od mnogih drugih autora toga vremena on nije čekao da bosanskohercegovačkim muslimanima neko sa strane definiše puteve njihova uključenja u savremene svjetske tokove. Đozo je to učinio sam, zbog toga ga s punim pravom ubrajamo u rijetke bošnjačke intelektualce koji su uspjeli “probaviti” ono što nazivamo “modernitetom” te odgovoriti na neka ključna pitanja muslimanskoga položaja u drugoj polovini dvadesetoga stoljeća.

Drugi odjeljak posvećujemo religijskim i teološkim temama. U njemu objavljujemo dva zanimljiva teksta. U prvome A. Jamalzadeh kritički raspravlja o mu'tezilijским egzegetičkim standardima. Drugi tekst autora Almira Fatića govori o stilistici Kur'ana u djelima našeg znamenitog alima Hasana Kafija Pruščaka.

I odjeljak *Refleksije* također sadrži dva teksta. Profesor Rasim Muminović piše o slobodi i ljudskoj odgovornosti dok Marko Đurić, naš stalni saradnik iz Kragujevca, piše o pravdi i religiji kao pouzdanim putevima dolaska do kolektivne i lične sreće svakog čovjeka.

Potom slijedi odjeljak koji je rezervisan za razgovor sa istaknutim intelektualcima našega vremena. Ovaj put urednik razgovara sa Mehmedalijom Hadžićem, bivšim bosanskohercegovačkim ambasadorom u Saudijskoj Arabiji i bivšim savjetnikom aktuelnoga reisa dr. Mustafe Cerića. Razgovor obuhvata brojna važna pitanja za sudbinu Bosne i Hercegovine, a sasvim posebno za sudbinu Islamske zajednice u našoj državi.

Odjeljak *Ekonomija i društvo* i ovaj put rezervisan je za tekst našeg mladog saradnika M. Kasumovića u kojem se govori o ekonomskom liberalizmu u

okvirima globalnih i regionalnih ekonomskih integracija. Odmah zatim slijedi odjeljak *Historijske teme* u kojemu objavljujemo tekst Ibrahima Pašića koji nastoji da historijski, lingvistički i etnološki objasni nastanak župe i naselja Nevesinje “Novo sinje” (Nova Sidrona).

U *Ogledima* Mehmed Kico, autor koji se u posljednje vrijeme ozbiljnije bavi fenomenom prevođenja, piše o kulturološkim teorijama prevođenja posebno se zadržavajući na njihovim filozofskim ishodištima.

Posljednji odjeljak *Bašagićeva poetika* sadrži tekst Sadata Dizdarevića u kojem se govori o uticajima perzijskog klasičnog pjesnika Firdusija na Bačagićevo pjesništvo.

Ovaj broj završavamo prikazima triju knjiga objavljenih kod nas. Elvis Fejzić predstavlja knjigu “Politike poricanja: o metapolitici i bosanskoj alter-politici” autora Esada Zgodića, Ivo Tomić se osvrće na knjigu “Stanovništvo i prirodna okolina” autora Sulejmana Festića i naposljetku Hasnija Muratagić-Tuna predstavlja djelo “Kur’an stilsko i matematičko čudo” autora Esada Durakovića i Lutve Kurića ♦

**Adnan Silajdžić**